

MUZEJ GRADA ZENICE

Dnevna štampa, radio, televizija dali su široke mogućnosti cjelokupnoj jugoslavenskoj javnosti da prati rad i djelovanje muzeja u Zenici. Sredstva javnog informiranja posvetili su punu pažnju ovom muzeju. - Informativa museologica donosila je redovno informacije o radu ovog muzeja. Unatoč toga vrijedno je rezimirati barem najznačajnije rezultate rada u toku godine.

Simpozij "Rudarstvo i metalurgija BiH od prehistorije do XX vijeka" najznačajniji je doprinos ovog muzeja u toku godine a istovremeno jedan od najznačajnijih naučnih doprinosa koje je dala cjelokupna naša muzejska služba u toku godine. O ovom Simpoziju donosimo i posebni prikaz.

U toku godine izdane su publikacije: Radovi III, referati Simpozija "Srednjovjekovna Bosna i evropska kultura" - Radovi IV, Dr Miroslav Draškić "Narodne nošnje sjeverozapadne Bosne", u štampi je Radovi V; Slobodan Zečerić "Elementi naše mitologije u narodnim obredima uz igru".

Izložba "Kopija grbova, povelja i pečata sredovjekovne Bosne" obišla je 8 gradova sjeverne Bosne. - Štampana je serija 18 razglednica srednjovjekovnih grbova Bosne.

Bogato je popunjena stručna muzejska biblioteka. Nabavljen je i faksimil Misala Hrvoja Vukčića Hrvatinića. - Filtoteka obogaćena je sa preko 50 dokumentarnih filmova - fototeka popunjena je sa znatnim brojem dokumentarnih snimaka.

Muzej se intenzivno angažirao na zaštiti spomenika tehnike i na pripremama za realizaciju odluke o osnivanju Tehničkog muzeja BiH u Zenici. - Angažiranje muzeja na zaštiti spomenika svoje regije urodilo je pozitivnim rezultatom. Prišlo se uređenju starog jevrejskog groblja sa nizom starih spomenika i na nekoliko značajnih historijskih spomenika i objekata (naročito na tvrđavi Vranduk).

Izrađeni projekti za adaptaciju i restauraciju i elaborati za uređenje "Hadži-Marića kuće" koja je predana Muzeju za etnografsku zbirku. Skupština općine Zenica osigurala je za ovu svrhu sredstva u visini od 103 mil.st.dinara.

Investicijama muzej je nabavio putničko vozilo fiat 1500, filmsku kameru, reporterski magnetofon, razne uređaje za fotolaboratorij, 28 novih vitrina. Iz istih sredstava načinjena je i dogradnja plakara za biblioteku.

Sa više strana muzej je dobio službena i javna priznanja za uspješan rad i djelovanje. U toku godine muzej je posjetilo preko 300 stručnih i naučnih radnika koji su u muzej došli sa posebnim interesom za određenu tematiku.

Program rada za 1974. godinu daje naslutiti još intenzivniju i bogatiju aktivnost koja i dosadašnjim radom postavlja ovaj muzej među naše najaktivnije muzejske ustanove. Godišnji izvještaj ovog muzeja je svezak sa 95 strana teksta i desetak strana ilustrativnih priloga. Nesumnjivo jedan od najkompletnijih "priručnika" za dokumentiranu ilustraciju djelatnosti jedne muzejske ustanove.